



UKA16/79

20. oktober 2016

Ane Hansen

**Inatsisartunut aalajangiiffigisassatut siunnersuutigineqarpoq Naalakkersuisut peqquneqassasut Inatsisartut 2017-imi upernaakkut ataatsimiinnerannut atatillugu ukiunut sisamanut misileraataasumik aqqissuussineq, nammineq inigisap aserfallatsaaliineqarneranut imaluunniit nukimmik sipaernerunissamut sanasunik suliaqartitsinermut atatillugu aningaasartuutit katillugit 20.000,00 kr. inummut ataatsimut akileraarutitigit ilanngaatigineqarsinnaalernissaanik suliaqassasut. Ukiut misileraataaffiusut tamarmik ukiumut 3.000.000 kr-nik aningaasanut inatsisitimmi illikartitsiviussaaq. Ukiut sisamat misileraataaffiusut ingerlareerpata misileraaneq malilersuiffigineqassaaq.**

(Steen Lyngge, Atassut)

Toqqissilluni nammineq akisussaaffimmik ineqarsinnaaneq kikkut tamarmik pisinnaatitaaffigigaat tamatta isumaqatigiissutigisinnaagunarpaput.

Taamaammat Inatsisartuni ilaasortap Steen Lynggep siunnersuutaa soqutigalugu nalilersuiffigisimavarput. Siunnersuut iluaqutissartanik arlalinnik taakkartuiffiuvoq.

Ilaatigut makkuninnga:

- namminerisamik illuutillit illuutiminnik aserfallatsaalinissamut katersaqarnerulernissaanik kajuminnerulersitsisinnaaneq.
- Illuutillit ikummatissamik atuinikinnerulernikkut CO2-mik aniatitsinerup annikinnerulersinnaanera.
- Illoqarfikkaani sanaartornermi suliaqartut suliaasaqarnerulersinnaanerat.
- Suliffissaaleqisut ikilineranik kinguneqarsinnaammat.

Inuit Ataqatigigiinnit oqaatigerusupparput siunnersuuteqartup tungavilersuutai arlalitsigut soqutiginarqartikkatsigit, siunnersuullu tapersersinnaavarput makkunangga kinguneqarsinnaappat:

- Nammineerlutik illuutillit akissaatikinnerit eqqarsaatigalugit illumik aserfallatsaaliinikkut salliutillugit periarfissinneqassappata.
- Illuutillit akissaatikinnerit nukissiutinik mingutsitsingitsunik atortulersuinissaminni iluaqutigisinnaappassuk.
- Illoqarfikkaani sanaartornermik suliffeqarfiit mikinerusut suliaasaqartitsinerminni iluaqutigisinnaappassuk.
- Suliassat suliffeqarfissuarnut nunatta avataannit pigineqartunut tunniunneqannginnissaat qulakkeerneqarsinnaappat.
- Minnerunngitsumillu suliaasaqartitsinermi kinguneqarluarsinnaappat.

# INUIT ATAQATIGIIT

## INATSISARTUNI



Taamatut oqaaseqarluta Inatsisartuni ilaasortap Steen Lynge siunnersuutaa sanasunik suliaqartitsinermut atatillugu aningasartuutinik akileraarutigut ilanngateqarsinnaatitaanerup eqqunneqarsinnaanera misissoqullugu aappassaaneerneqartinnani Inatsisartut Sanaartornermut ataatsimiisitaliani nalilersorluarneqassasoq inassutigaarput.